



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ՀԱՆՐԱՅԻՆ ԾԱՌԱՅՈՒԹՅՈՒՆՆԵՐԸ ԿԱՐԳԱՎՈՐՈՂ ՀԱՆՁՆԱԺՈՂՈՎ**

**Ո Ր Ո Շ ՈՒ Մ**

31 հունիսի 2019 թվականի №288Ա

ք. Երևան

**«ՀԱՅԱՍՏԱՆԻ ԷԼԵԿՏՐԱԿԱՆ ՑԱՆՑԵՐ» ՓԱԿ ԲԱԺՆԵՏԻՐԱԿԱՆ ԸՆԿԵՐՈՒԹՅԱՆԸ  
ՆԱԽԱԶԳՈՒՇԱՑՆԵԼՈՒ ՄԱՍԻՆ**

Հաշվի առնելով, որ՝

- ա) Հայաստանի Հանրապետության հանրային ծառայությունները կարգավորող հանձնաժողովը (այսուհետ՝ Հանձնաժողով), համաձայն իր 2014 թվականի հունիսի 25-ի №207Ա որոշմամբ հաստատված հանրային կազմակերպությունների գնումների կարգերի նկատմամբ սահմանված լրացուցիչ պահանջների կատարման մոնիթորինգի կարգի, իրականացրել է «Հայաստանի էլեկտրական ցանցեր» փակ բաժնետիրական ընկերության (այսուհետ՝ Ընկերություն) կողմից 2018 թվականի 3-րդ եռամսյակում կայացած А-608-18 ծածկագրով «Ծրագրային փաթեթների օգտագործման լիցենզիաներ», А-594-18 ծածկագրով «35 կՎ ՕՍԲ ուժային մալուխ 3\*150» և 4-րդ եռամսյակում կայացած А-692-18 ծածկագրով «Տրանսֆորմատորային յուղ» գործարքների (այսուհետ՝ Գործարքներ) մոնիթորինգ, որի արդյունքում պարզվել է, որ Գործարքները Ընկերության 2018 թվականի տարեկան հաստատված բյուջեի հիման վրա կազմված գնումների պլանում (այսուհետ՝ Գնումների պլան) նախատեսված չեն եղել,
- բ) 2019 թվականի հունիսի 12-ից Ընկերության նկատմամբ հարուցվել է վարչական վարույթ՝ Հանձնաժողովի 2017 թվականի սեպտեմբերի 13-ի №391Ա որոշմամբ սահմանված հանրային կազմակերպությունների գնումների կարգերի նկատմամբ լրացուցիչ պահանջների (այսուհետ՝ Լրացուցիչ պահանջներ) 7-րդ և 13-րդ կետերով սահմանված պահանջների հնարավոր խախտման փաստի ուսումնասիրության նպատակով, որի ժամկետը երկու անգամ 10-ական օրով երկարաձգվել է,

- զ) Ընկերությունը հարուցված վարչական վարույթի շրջանակում 2019 թվականի ապրիլի 3-ի №114-19, հունիսի 20-ի №236-18, հուլիսի 18-ի №269-19 և հուլիսի 23-ի №276-19 գրություններով և սույն թվականի հուլիսի 8-ին Հանձնաժողովում կայացած քննարկման ընթացքում, Լրացուցիչ պահանջների 7-րդ կետի համաձայն, ներկայացրել է համապատասխան շուկայի ուսումնասիրության արդյունքները և պարզաբանումներ, որոնց համաձայն՝ ծրագրային փաթեթների օգտագործման լիցենզիաների ձեռքբերման գործարքը Գնումների պլանում գնումն իրականացնելու պահին նախատեսված չի եղել, սակայն հետագայում ներառվել է Գնումների պլանի լրամշակված տարբերակում, 35 կՎ ՕՍԲ 3\*150 ուժային մալուխի ձեռք բերման գործարքը նախատեսված է եղել առաջին եռամսյակում, ինչը Գնումների պլանի լրամշակված տարբերակում չի ներառվել: Հետագայում, Գնման առարկայի ձեռքբերման անհրաժեշտությունից ելնելով, նշված գնման առարկայի ձեռքբերումը կրկին ներառվել է Գնումների պլանում: Տրանսֆորմատորային յուղի ձեռքբերման անհրաժեշտությունը պայմանավորված է եղել կառուցվող բարձր լարման ենթակայանների շահագործումն ապահովելու նպատակով և Գնումների պլանում նշված գործարքը չներառելը պայմանավորված է վերոնշյալ ենթակայանների շահագործման հանձնումը 2018 թվականին նախատեսված չլինելով,
- դ) Լրացուցիչ պահանջների 7-րդ կետի համաձայն՝ գնումների կատարման ընթացակարգերը պետք է հիմնված լինեն գնումների գործընթացում հատուցման դիմաց արժեք ստանալու սկզբունքի ապահովման վրա,
- ե) Լրացուցիչ պահանջների 7.1-րդ կետի համաձայն՝ հանրային կազմակերպության կողմից գնումը կատարվում է, երբ այն նախատեսված է տարեկան հաստատված բյուջեի հիման վրա կազմված գնումների պլանով,
- զ) Լրացուցիչ պահանջների 13-րդ կետի համաձայն՝ փոփոխությունների դեպքում Գնումների պլանի լրամշակված տարբերակը ենթակա է վերահրապարակման հինգ աշխատանքային օրվա ընթացքում,
- է) հարուցված վարչական վարույթի շրջանակում փաստվել է, որ Ընկերությունը խախտել է Լրացուցիչ պահանջների 7.1-րդ և 13-րդ կետերը՝ գնումն իրականացնելով առանց Գնումների պլանում նախատեսելու և փոփոխությունների դեպքում գնումների պլանի լրամշակված տարբերակը

սահմանված կարգով վերահրապարակելու, իսկ Լրացուցիչ պահանջների 7-րդ կետով սահմանված պահանջը չի խախտվել,

և հիմք ընդունելով «Էներգետիկայի մասին» Հայաստանի Հանրապետության օրենքի 42-րդ հոդվածի 1-ին և 4-րդ կետերը՝ Հանձնաժողովը **որոշում է.**

1. Լրացուցիչ պահանջների 7.1-րդ և 13-րդ կետերի խախտման համար Ընկերությանը նախազգուշացնել:
2. Ընկերությանը՝ ընդունել ի գիտություն, որ իրավասու է սույն որոշումն ուժի մեջ մտնելու պահից երկամսյա ժամկետում այն բողոքարկել Հանձնաժողով կամ Հայաստանի Հանրապետության վարչական դատարան:
3. Սույն որոշումն ուժի մեջ է մտնում Ընկերությանն օրենքով սահմանված կարգով իրազեկելուն հաջորդող օրվանից:

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՀԱՆՐԱՅԻՆ  
ԾԱՌԱՅՈՒԹՅՈՒՆՆԵՐԸ ԿԱՐԳԱՎՈՐՈՂ  
ՀԱՆՁՆԱԺՈՂՈՎԻ ՆԱԽԱԳԱՀ՝**

ք. Երևան  
31 հուլիսի 2019թ.

